

34-6-E-25-

LUCAE DORASCENTII
PALIANENSIS

Philosophiae ac Medicinae Doctoris

DE USU CHALYBIS ATQUE MERCURII

In obstructione curanda

DISSERTATIO

Ad Virum celeberrimum Albertum Haller

Gottingensem

Sub auspiciis Illustrissimi atque Excellentissimi

PRINCIPIS

D. MARCI ANTONII

COLUMNÆ.



3

R O M A E M D C C X L V .

Ex Typographia Komarek in Platea Sciarrae in Via Cursus.

Superiorum Facultate.

THE
JOURNAL OF THE
ROYAL ANTHROPOLOGICAL INSTITUTE

OF GREAT BRITAIN AND IRELAND

VOLUME XXXI

PART I

1901

LONDON

W. B. E. D. S.

1901

1901

1901

ILL^{MO} ATQUE EXC^{MO} PRINCIPI
D. MARCO ANTONIO
C O L U M N A E

LUCAS DORASCENTIUS PALIANENSIS

Perpetuam Felicitatem.



Raestantium
Medicorum,
MARCE ANTONI
COLUMNA adolescens clarissime,
neque magna umquam copia, &
semper magna laus fuit. Copia

ne fuerit, id in causa est, quod ad Medici in arte excellentissimi nomen tuendum necessaria sit multarum artium, & facultatum cognitio : quas qui optime teneat, iisque ad morbos intelligendos, curandos, praecavendos pro suo munere utatur, ille in animis omnium incredibilem parit admirationem sui, ita prorsus, ut tamquam coelo delapsus, & ab omnium bonorum auctore Deo humano generi ad salutem concessus videatur. Sed quotus quisque est, qui hoc ingenio, & labore sit consecutus, ut egregius Medicus, hoc est artibus iis, quae ad Medicam laudem requirun-

tur, optime instructus haberetur? quotus physicam scientiam cum anatomica facultate, cum astronomia, cum rerum prope infinitarum, quae ad morbos curandos usui esse possunt, cum animi, & corporis affectionum cognitione praestanti ita conjunxit, ut sanandis aegrotis opportuna remedia usquequaque praescriberet? Quae mecum ego cum reputarem, adduci non poteram, ut eorum iudicio plane acquiescerem, qui nescio quid boni de ingenio meo, industriaque augurantes, auctores mihi fuerunt, ut in haec studia diligenter incumberem: quod illi tamen hor-

tationibus suis, ac prope convicio pervicerunt. Itaque ad eam philosophiae partem, quae mechanica dicitur, cognoscendam primum me contuli; deinde, eximio praeceptore, qui mihi quaedam divina virgula contigit, quasi manu ducente, in observandis morborum causis, & curationibus, in Medicorum scriptis, qui hac aetate peritissimi habentur, pervolutandis plurimum operae collocavi. Demum tentavi, quid ipse possem, scripsique brevem Dissertationem de usu Chalybis, atque Mercurii: & cum admirabili desiderio tenerer insinuandi me aliquam in gratiam tuam, iter

mihi

mihi ad eam praemunire hoc munusculo volui. Ut autem id facerem (quamquam Dei munere singulari in eo sum Oppido & natus, & educatus, quod Pater tuus in Latio celeberrimum summa cum potestate obtinet) ne vivam, si me aut divitiae, quibus abundas, aut generis tui claritas, aut quicquam denique praeter maximas tuas, & jam nunc omnium sermonibus celebratissimas virtutes incitavit: Nam opulentorum, qui honesta studia spernant, non modo non ambire, ac persequi, sed aspernari etiam, ac refugere amicitias soleo, non semel expertus, nihil esse ejus-

modi

modi hominibus importunius ;
 generis autem nobilitas , quae in
 Te quidem summa est , in iis de-
 mum habet aliquid gloriandum ,
 qui faciunt id , quod Tu , hoc est
 in iis , qui omni ope moliuntur
 efficere , ut ne minus ipsi splen-
 doris posteris suis tradidisse ,
 quam a maioribus accepisse vi-
 deantur . Itaque colunt Te qui-
 dem homines , & observant , ut
 optimi illius , omnibusque vir-
 tutibus , quae Viro Principi , &
 in alta fortuna dignitatem te-
 nenti apprime conveniunt , or-
 natissimi Fabricii Columnae fi-
 lium ; sed multo Te , mihi crede ,
 impensius colunt , quod eam te-
 viam

viam ingressum, aut potius in ea jam longe progressum vident, in qua si, ut spes minime dubia est, perstiteris, non ille apud posteros candore illo, atque altitudine animi, magnificentia, integerrimis moribus, religione praestanti, quam Te filio, clarior sit futurus. Jam enim possunt ex Te ipso quam plurima magisque propria tuae laudis argumenta desumi, ingenium excellens, acre, ac indefessum literarum studium, bonarum artium cognitio tanta, quantam Tu cum paucis aliis in istam aetatis viriditatem cadere posse docuisti; tum quod praecipuum

est , ita compositi mores , ut juven-
 tus tua multorum senectuti
 exemplo esse possit . Vel supe-
 rioribus his diebus , cum e Se-
 nensi Ptolemaeorum Collegio ,
 ubi nominis tui ingenti fama
 relicta studiorum cursum confe-
 ceras , in Urbem venisses , Te-
 que in aula Palatii Quirinalis
 eorum specimen dantem Sapien-
 tissimus Pontifex BENEDI-
 CTUS XIV. coram audire vo-
 luisset , quanto , Deum immor-
 talem , acumine ingenii , doctri-
 naeque apparatu , quanta ser-
 monis copia , & elegantia , quan-
 ta omnium , qui aderant , Ti-
 bique argumenta proposuerunt ,

Cardinalium, Praefulum, non approbatione tantum, verum etiam admiratione de altissimis rebus differuisti! Mathematicis nempe, Phycis, Theologicis, & ad Jus Pontificium pertinentibus. Quo factum est, ut idem Pontifex ingeniorum acerrimus aestimator, qui Te praefens honore numquam aliis tributo ornare voluit, Praefecturam Palatii Tibi ultro detulerit, nec sine magna commendatione virtutis, & sapientiae. Attigi breviter ea, quae me potissimum, ut hanc meam Diatribam tuo nomini inscriberem, impulerunt. Parvum munus, fateor;

(XII)

sed & a magno animo profici-
scitur, & majora alia, ut mihi
meis de studiis sperandum est,
subsequentur, si hoc Tibi non
ingratum fuisse cognovero.



DE USU CHALYBIS

Atque Mercurii

IN OBSTRUCTIONE CURANDA

DISSERTATIO.

Eruditissimo, Amplissimoque Viro Alberto Haller

LUCAS DORASCENTIUS

S. D.



Llustrium Virorum fama, cum
ubique terrarum diffusa est,
hoc potissimum habet, ut eo-
rum gloriam cujusque gene-
ris, & conditionis hominibus
notam efficiat; immo vero,
cum de litteris agitur, ad illos
etiam perveniat, qui eas tantum a limine saluta-
runt, aut primoribus labiis attigerunt. Quod
cum optime tibi perspectum sit, nihil sane
miraberis, eruditissime Haller, cur mihi tan-
tum honoris tribuere audeam, ut ad te scri-
bam Epistolam, testem meae obsequentissimae
erga te voluntatis: mihi, inquam, qui licet
aetate, & ingenio non sim cum caeteris, qui
Romae vivunt, Medicinae cultoribus compa-
randus, tamen ope, ac praesidio commentario-
rum,

rum, quos, doctis Viris plaudentibus, ad communium studiorum utilitatem edidisti, confido me in re Medica non mediocriter profecturum. Quid ni? Antonius Cocchius nemini ignotus, tibi vero notissimus, quem Numine dextro studiorum meorum optimum ducem, ac magistrum sum nactus, tanta eos copia eruditionis abundare testatur, ac novis adeo experimentis, observationibus, argumentis esse tam luculentos, ut ea de causa hujus te aetatis, quae floret maxime laude litterarum, secundum nemini censeat. Boerhaavii institutiones adhuc lumine carerent, ac frustra id expectassent, ni boni superi Hallerum tandem dedissent, qui eas optime illustraturus, pulcherrimarum rerum thesaurum nobis optantibus aperiret. Dicam quod sentio; non assentandi gratia. Ubinam major, quam in his tuis commentariis, aut in rebus quam difficillimis pertractandis ingenii vis, aut felicitas in solvendis, aut facilitas in explicandis? Haec sunt mehercule, quae ita me tibi addictum reddidere, ut gloriae tuae praedicandae, & quantum fieri per me potest, amplificandae desiderio exardeam. Nec vero istud aut mediocre est, aut obscurum, aut hujusmodi, ut silentio praeteriri possit. Nam cum Medicis, iisque vulgo celebrioribus tanta contentione decertavi,

quan-

quanta numquam antea ulla in causa: et jure quidem, ac merito. Quis enim causam, quae optima sit, lucis in sole defendendae suscipere, nollet, lubenterque pro viribus sustinere? Caecutiunt plerique hujus saeculi Medicorum, qui si forte gravissimorum hominum scripta vel non intellexerunt, vel etiam (quod turpius est) pervolvere, & cognoscere neglexerunt, ad suam tegendam vel inscitiam, vel ignaviam, ajunt id omne supervacaneum sibi videri, quod lucubrare scriptores aetatis nostrae, ac typis edere voluerunt. Crede mihi humanissime Haller, nimis acerbum, nimis asperum est indoctos istos etiam in magnis, clarissimisque civitatibus triumphantes intueri; qui non modo freti popularibus auris, sed etiam plausu virorum principum celebrati, ubique se jaçant, atque adeo inscitiam cum incredibili temeritate conjungunt, non sine magno sapientum dolore, & iracundia. Quoniam vero se sola virtus contenta est, neque infami vulgi honoribus eget, ad Te, Vir clarissime redeo; quem cum audiverim multum operae infumisse in Boerhaavio Lugdunenfi Professore observationibus illustrando, enixe rogarem, & obtestarer, ut, quae jam edidisti, ad me mitteres; si mihi, ut sunt, ad manum non essent; ne, qui gloriae tuae faveo, tuorum ope

operum jucundissimo fructu diutius carerem, simulque labi occasionem permetterem communicandae cum aliis doctrinae tuae, quae in eisdem operibus maxima continetur. Nunc iudicium de quodam Opusculo meum legendum tibi, atque, uti spero, approbandum exhibeo.

Prodiit nuper in lucem Oratio Botanica, quam philosophus quidam e Medicorum Collegio in horto Academico habuit. Hoc unum captu mihi difficile visum est, quod ille ait: *Quoties; dum obstructionibus per Chalybem medebamur, eas nos vidimus in scirrbum, aut cancerum insanabilem permutatas? quoties nos. hydrargyrum, & caetera, quae ab eo sunt per medicamenta, sumus execrati, dum tantos ab iis vidimus fluctus, tempestatesque excitatas, ut quid consilii caperemus, nesciremus?* Qua quidem in re fugit philosophum ratio, mea quidem sententia. Ejus enim observatio inutilis est, quippe quae non ex accurata historia, non ex enumeratione juvantium, ac nocentium, non ex cadaverum sectionibus deducta sit. Utinam vero ex iis, quae diximus, profecta esset. Tunc enim de indole morbi perbelle ille, atque caeteri iudicassent; essentque cautiores in quibusdam tractandis medicaminibus; neque ille tam praecipuus in affirmando fuisset: *Chalybem in cancerum, & scir-*

& scirrhum permutare obstructiones, & hydrargyrum fluctus, tempestatesque excitare.

Jure optimo culpanda ejus opinio est, quem non puduit duo illa medicamina ex Chemia explodere, mortalium generi utilissima, ac nobilissima scientia, cujus unius est virtutes terrae multiplices investigare. Saepe cogitabo de illa vulgari observatione, quae non habetur in ante dictis; praesertim vero cum Scriptoris illius observatio in duobus illis medicamenti generibus non parum mihi videatur experientia labefactari, quam Scriptor ille vel, ut par erat, minime attendit, vel numquam vidit. Quibus nos documentis si vellemus insistere, Chemicam scientiam longe profecto salutarem, ejusque praecepta, quae a gravibus auctoribus nobis tradita sunt, contemneremus. Nam *falsum dicere ex bona ratione, turpe non est, falsum vero palam, negare sat est*, teste Quintiliano. Verum studia nostra locabimus in defendenda viriliter veritate, & fideliter pro Chemia certabimus. Chemicam, sive spargiricam, quae ad salutem humani generis, atque ornamentum haud contemnendum inventa est, jam dudum sopitam, in lucemque deinde revocatam quidam dixerunt, non secus ac fulmina tormenti bellici, ad communem lanienam, atque perniciem. Hanc scientiam

tiam a Daemonibus filiabus hominum datam in pretium amoris putarunt nonnulli: qui error sane antiquissimus ex eo duxit originem, quod illi sensum Scripturae genuinum assecuti non essent Genes. 6. 2. Scriptorum catalogum non est facile texere, qui de hoc argumento disseruerunt: praecipui tamen sunt, Osvvaldus Crollius, Beguinus, Joannes Hartmannus, Joannes Petrus Faber, Le Mery, Le Mort, Basilius Valentinus, Paracelsus, Rogerius Baco, Raymundus Lullius, Joannes Rudolphus Glauberus, Joachimus Beccherus, Ettmullerus, Boerhaavius, Hoffmannus, Poterius, & alii complures. Inter mineralia siquidem, quae eruuntur ex visceribus terrae, quae centrum, seu matrix elementorum omnium appellatur, & in quam elementa projiciunt sua spermata, & semina, quae terrae sinu fovantur, ac digeruntur, chalybs, & hydrargyrum computantur. Priusquam vero utrorumque mineralium vires, naturamque investigem, de obstructione, scirrhus, nec non cancro, quantum brevis hic necessaria permittit, quaedam notanda judicavi: ac primum de obstructione.

Obstructionem Hermannus Boerhaavius in aphorismis de cognoscendis, curandisque morbis numquam satis laudatis definivit, dicens,

cens,

cens , quod sit obturatio canalis , transitum tollens liquido , per eum transjiciundo , vitali sano , vel morboſo , orta ex exceſſu molis tranſiturae ſupra capacitatem vaſis tranſmiſſuri . Eſt autem duplex obſtructio , eorum ſententia , qui Medici habentur accuratiſſimi ; quarum unam oppilativam , ab humore vas infarciēte ; attenuativam alteram , per collapſum vaſorum , atque viarum , dicere ſolent . Cuique Medicorum notum eſt , has ab humore craſſo , deſide , tenacique proficiſci : deque his ſapienter Thomas Warthonus Adenograph. cap. 11. ſcripſit , ac quinque modis contingere affirmavit . *Primo , in ipſo aditu ſucci lactei in oriſcia venarum lactearum . Secundo , in tranſitu ejusdem per meſenterii glandulas . Tertio , in tranſitu ſanguinis ex arteriis in venas per earumdem glandularum ſubſtantiam . Quarto , in canalibus aquoſis , vel lymphae ductibus . Quinto , in nervis .* Canaliū praecipue de nomine , in quos maſſulae ſanguineae conſeſtim impelluntur , ocuſque deferuntur , qui obſtructionibus magis obnoxii ſunt , arterioſi , venoſique fere unanimi conſenſu nuncupantur . Perpenſa generaliſſima obſtructionis idea , iſtiusmodi aliquod exemplum aſſerre decrevi in diſſert. de Chloroſi , quae , Deo dante , proximo anno in lucem prodibit . Dum ergo arterioſi , & venoſi canaliculi ,

qui per uteri substantiam serpunt , obstructionem in virginibus patiuntur , morbus Virgineus , seu Chlorosis confestim accidit : cujus aetiologiam repetere libet a sanguinis impuri , & humorum viscidorum , ac minus motui aptorum abundantia , tum ob deperditum tonum , vigorem , ac vim solidarum partium , maximeque viscerum chylicationi inservientium , quae sunt ventriculus , intestina , hepar , lien , ac pancreas : tum ob ipsarum sanguificationi inservientium robur labefactatum in machina nostra ; ut sunt arteriae , venae , cor , ac pulmones . Nam dum partes nostri corporis fibrosae , & vasculosae minus possident motum oscillatorium , non fiet illarum contractio , adeo ut in arcum distentae abbrevientur ; & in lineas disponentur rectas , neque accedent circa cavitatis axem , neque ad humores valide appellendos erunt idoneae ; atque ita sanguinis circuitus tardior , lentiorque evadat necesse erit ; & hinc separationum aequae , ac excretionum negotium saluberrimum imminuitur . Unde sordes excrementitiae viscidae , biliosae , falsae , ferrosae , quae in hepate , renibusque secerni , ac foras ejici debent , maxima ex parte retentae ; impurum plane , ac intemperatum reddunt sanguinis serum , & succum nutritium .

Temporis decursu

curſu fibrae motrices extremorum in cute vaſorum, ex Ruſſchii injectionibus ſtupendis primum rite cognitorum, proprio ac naturali deſtituuntur robore; & ſic tam ſudor, quam Santoriana ſeparatio impeditur; unde in corpore reticulari Malpighii, ſive reticulo cutaneo, cuticulam inter, & cutem circumpoſito, a tincto ferro pallidus, & ſubalbidus, immo plumbeus, liveſcens, aut vireſcens color cum aliqua corporis intumeſcentia deprehenditur; quo fit, ut ipſa nutritio impediatur. Similiter contingere videremus obſtructiones, ſi cadavera ſedulo introſpiceremus, quorum ſectiones ſi quis optaret, Sepulchretum anatomicum Boneti adeat: maxime autem eas videremus in imi ventris viſceribus, praefertim vero in binis meſeraicis arteriis, quarum ſuperior per tenuia, inferior per craſſa inteſtina perreptat, & utraque arcum, inſulamque conſtituit. Cerneremus has quoque in ramo dextero, ſiniſtroque coeliacae, quae proxime ſupra meſentericam ex aorta prodit, arcum facit antrorſum, deinde retrorſum fleſtitur; qui quidem rami per lienem, pancreas, ventriculum, & hepar proſerpunt; quorum diameter in principio ampla manifeſtatur, in extremitatibus vero in anguſtiorē pergīt. Dum igitur maſſulae ſanguineae, quae in conica impelluntur vaſa per dia-

diametrum ampliorem, non difficile transmittuntur, (in extremitate siquidem canaliculi cylindrici fiunt) valida contractione humorem sanguineum, quo nullum animal caret, appellant. Si igitur teretes massulae fiant majores vasis cylindrici, conicique diametro, transire nequeunt. Quocirca in ramis meseraicis, ac coeliacis obstructions contingunt: & cum nos mechanica & hydraulica doceat, fluida in corpore humano alia aliis motibus ferri, tunc illa oblique, ac retro incumbunt, & urgent. Nequeo ferre Michelotti sententiam, pace tanti viri, dum ait p. 35. 38. *Crassa fluida dicenda, non quae particulas habent maximas, sed ea, quorum particulae difficulter trajiciuntur.* Idcirco enim particulae, vel nullo pacto, vel saltem difficile trajiciuntur, quia sunt crassae, atque maximae, ac dum sibi invicem cohaerent, inde moles fluidorum maxima efficitur, dum mutua vi sese per vasa trahunt particulae diversae massae sanguineae, & sic oritur cohaerentia. Cohaerentiam divinitus Elem. physic. Petrus Musschenbroekius defini- vit. *Est ea corporum conditio, qua partes quomodo- cunque, & a quacunque causa conjunctae, divul- sioni resistunt, ita ut eadem vi a se mutuo separari nequeant, qua aut solae moveri, aut sibi tantum- modo impositae, sejungi iterum potuissent, sed vim*
postu-

postulent multo majorem. Idipsum confirmare in venis ejusdem generis supervacaneum non erit : nam ex demortuorum sectionibus quaedam obstructions deprehensae sunt , ut Bonetus , Willifius , Blancardus , Wepherus , Pechlinus , aliique indubiam fidem faciunt . Quin etiam nos experientia edocti sumus , quod sinus durae meningis , qui triangulum imitantur , sive quatuor sint , ut Ortlobius , & Vieussenius demonstrant , sive quatuor supra quatuor , ut eos Winslovus enumeravit , nec non jugulares internae venae sanguine mucoso , crasso , deside infarctae sunt , immo substantiam fere polyposam referunt . Et ratio in promptu est : cum enim istae venae impulsu destituantur , inde tardior , lentiorque fluidi sanguinei motus exoritur . Hinc non miramur obstructions natas esse , si particulae sibi invicem cohaereant .

Longe adhuc prolixius , & accuratius hujusmodi afflictionis proximam causam tradidit gravissimus Auctor noster in suis aureis aphorismis , dum num. 108. ait . *Obstructio oritur ex angustia vasis magnitudine molis fluxurae , vel utriusque concurrentibus.* Quicquid igitur potest haec tria facere , hoc est angustare vas , cruorem desidem per ipsamet vasa appellere , & quicquid simul potens est vas arctare , & sanguinis massam

sam minus ad motum fluidam reddere , causam procatarticam , seu remotam nuncuparem . Quæ si quis plenius intelligere cupiat , Hermannum Boerhaavium , nec non ejus commentatorem Gerardum Van Swietenum de obstructionibus consulat . Nunc ordo postulat , ut affectionis scirrhusæ naturam dispiciam .

Scirrhus communiter est tumor durus , renitens , concolor , indolensque . Quamvis autem eum distinxerint in legitimum , seu exquisitum (quam descriptionem disertis verbis apud senem Galenum legimus) tamen distinctio illa constans non est . *Exquisitus igitur scirrhus tumor est præter naturam , sensu carens , & durus . Non exquisitus autem non omnino quidem sine sensu est , sed agere tamen admodum sentit . Qui igitur sine sensu , incurabilis est ; qui vero hebetis sensus est , non quidem insanabilis est , tamen non facilis curatu :* quam opinionem etiam in Boerhaavii aphorismis Van Swietenus commemorat . Ejus morbi sedem fuisse glandulam didici ex nonnullis Auctorum observationibus . Inter recentiores quidem laudatus Heisterus anno 1725 . Glandulam Tymum deprehendit in puero tredecim annos nato hæctica extincto , scirrho induratum , moleque ingentem . Idem Auctor glandulam dorsalem a Magno Vesalio delineatam , ad ovi gallinacei magni-

gnitudinem auctam . Unde esophagus ita compressibatur , ut nihil amplius transire potuerit . Philippus Verheyenus observavit ex dorsalium glandularum tumore , ac scirrhotate patientem prae inedia misere obiisse , omni scilicet via cibo potuique ad ventriculum praeclusa . Post sectum enim cadaver , esophagi latera ob vehementem compressionem coaluisse animadvertit , ipsumque ejus tubulum sub glandulis illis abiisse in corpus solidum introspexit . Scirrhum in majore oculi sinistri cantho natum , castaneam aequantem , feliciter abstulisse Hildanum , scribit Van Swietenus in comment. Boerhaavii . Tonsillas , post inflammationem illarum male curatam , in scirrhum induruisse vidit ipse Auctor aliquoties . Plurimae forent Medicorum observationes huc adducendae de scirrho ; verum , ut brevitati consulam , paucas retulisse sufficiat . Symptoma illud , quod experientia compertum habuimus , hic nullo negotio extricatur . Quippe mulieres quinquagenarias hysterica passione graviter laborantes , nec non virgines , quae immaniter mensium suppressionem passae fuerant , ocyus , ac par est , talibus affectas scirrhis non raro observavimus . Ratio est , quia dum menses in illis cessant , sanguis ille , qui fluere solitus erat , sive per vaginam , sive per

uterum (qua de re Anatomici magna inter se contentione dimicant) ad alia vasa regurgitat; deinde ob vasorum actionem in ipsamet fluida labefactatam, haec spissiora fiunt, atque adeo in glandulis ibi repertis interclusa scirrhum morbum producant. Scirrhi causa merito recensetur viscida, crassa, viscosaque materia, dum particulae istae sanguineae cum tardis, *quae majorem habent vim inertiae, vel motum citius amittunt* (Praeceptore Hallero), se se attrahunt, naturamque gypseam, immo vitream acquirunt, impactae, insertaeque in ejus spatia per adhaesionem magnam: sic in glandulis scirrhus inchoatur, perficiturque. Causae remotae inquirantur attentius apud Boerhaavium, & Gerardi Van Swietenii commentarios. Jam vero proximum est, ut ad cancerum expendendum, quantum in me erit, aggrediar.

Cancer a similitudine cancri nuncupatus, tumor est rotundus, lividus, aut subniger, dolensque, dum canales circumcirca scirrhum inflammari incipiunt: inde exulceratur, & in pus convertitur. Non parum aberrarunt a veritate illi, qui cancerum ad solas mulierum mammas, & virorum scapulas restrinxerunt. Nam exemplis docemur, quae a multis scriptoribus memoriae prodita accepimus, in aliis quoque corporis

poris partibus caneros enasci, ut in labiis, lingua, in pene virili: quae nos quidem exempla apud Hildanum legimus. In virgine adulta satis magnam verrucam in dorso locatam in cancrum degenerasse Van Swietenus observavit. Idem auctor vidit in pollice pedis, dum unguem imprudentius secuerat chirurgus in quadam rustica, laeferatque tenerrimam illam pulpam nervosam, quae ibi est, similem excrevisse fungum; quem cum rodentibus consumere tentaret idem chirurgus, sic irritavit, ut in horrendum cancrum abiret. Superiore anno in pede dextro cujusdam artificis cancrum ego observavi cum Praeceptore in urbe Roma; quem feliciter ille curavit. Igitur non tantum in scapulis, ac mammis, verum etiam in quibusdam aliis partibus cancer enascitur. Causam hujusmodi morbi recte est affecutus Boerhaavius, dum ait: *est quidquid scirrhum facit, acre scirrhum mixtum; mutatio in circulantibus, a menstruis, haemorrhoidibus, haemorrhagia qualibet retentis; sterilitas, caelibatus, effoeta aetas a 45. ad 50. annos; victus austerus, acer, calidus; affectus animi tristes; & biliosi; irritatio externa quaelibet, motu, calore, acrimonia, emolliente, suppurante, caustica, vesicante medelæ externa, vel interna similia peragente.* Haec de obstructione,

scirrho, & cancro dicta sint satis. Nunc de chalybis natura in obstructionibus agendum est.

Chalybs (testante Andrea Baccio lib. 6. de Thermis cap.2.) *nominatur quasi ferrum Chalybium, a regione Chalybum in Ponto, ubi purissimum ac durissimum gignitur.* Ferrum etiam Mars ab aliquibus dicitur, quod Mars planeta in productione ferri suas partes habeat radiis immittendis, & in terrae sinu radicitus implantandis. Sapienter igitur illustres viri scripserunt, nihil esse in ipso Marte, quin reperiatur in ferro; de quo Plinius: *hoc tellurem scindimus, serimus arbusa; ponimus pomaria, vitae squalore deciso annis omnibus cogimus juvenescere. Hoc extruimus tecta, caedimus faxa, omnesque ad alios usus ferro utimur: Sed eodem ad bella, caedes, latrocinia, non cominus solum, sed etiam missili, volucrique, nunc tormentis excessso, nunc lacertis, nunc vero pennato, & aliis, recenter in perniciem hominum inventis.* Jurequidem Scriptores nonnulli ferrum Martem appellarunt, non solum quod hic planeta in generatione, & productione ferri dominium exerceat, suasque tunc temporis in ferrum virtutes, ac proprietates inducat; sed quod etiam Martis naturam ferrum sequatur, & imitetur. Si quempiam Medicorum non pudet contemnere chalybem, is etiam ferrum, seu Martem.

con-

contemnat necesse est; cum tamen ferrum propter consistentiam, & duritiem, qua pollet, valde conducat ad corporis humani sanitatem. Neque enim hujus oeconomia posset in aequilibrio sustineri, deficiente laudato remedio; sine quo Medicina claudicans foret, & imbecillis. Ut id ipsum de chalybe pro dignitate demonstrem, ita constituo, chalybem in obstructionibus persanandis utiliter adhiberi. Non enim tam equitatio laudabilis, atque utilis est per celeberrimos Anglos, Sydenhamum, & Mortonum, qui eam non dubitant in hectica, & phthisi praesentissimam appellare; non tam Mercurius luem Celticam ex humano corpore potest ejicere; non tam Cortex Peruvianus febres intermittentes expugnare; non tam Laudanum liquidum, sine quo Medicina manca esset juxta Sydenhamum, sedare colicam valet, quam est chalybs idoneus ad obstructiones tollendas. Chalybs remedium est celebratum a viris clarissimis, tum veteribus, tum recentioribus, parum vero cognitum a philosopho nostro, qui non intelligit, quibus hoc medicamentum viribus polleat ad obstructiones debellandas; id quod multis rationibus planum fiet. Neminem praeterit, a Methodicis bina morborum principia tradi, quorum unum laxum, alterum vero adstrictum appellant; illaque eorum

me-

methodus hujusmodi erat, ut pro laxantibus adstricta remedia, pro adstrictis laxantia applicarent. O veram, ac recte nobilem methodum! Tibi, o Medicorum Princeps Hippocrates, hoc quoque debemus: fit enim eo, ut malae omnes affectiones expugnentur, ac valetudinis commodo consulatur. Quid tum denique? Hoc pacto dum nimiae solidorum rigiditatis insidias satis clare cognosco per propria signa, idest per durum, subtilem, ferrinumque pulsum, una cum accensa siti conjunctum; continua vigilia, diro vomitu, exanthematibus, ingenti delirio, alvi duritie cum cutis asperitate; singultu, ac inflammatione, statim eorum laxationem tentandam, & inducendam arbitror. Contra vero reparandum vigorem, nimia eorundem flacciditate cognita, habitis symptomatis, hoc est, pulsu molli, debili, frigore in extremitatibus ingenti, lingua nimis humida, simplici nausea, corporis fluxu, humido cutis sudore, magna somnolentia, viriumque prostratione. Quapropter censeo repetendum, quod in aureis aphorismis artis Parens Boerhaavius scriptum reliquit, dum ait: *Rigiditas fibrae nimia est adunatio partium minimarum, quae tam valide faciat eas cohaerere, ut non cedant illi actioni fluidorum, quae superare debet hanc resistantiam, ut maneat sanitas. Contra*

tra fibrae debilitas vocatur adunatio partium minimarum cum nisu in cohaesionem tam parvo, ut vel illo levi motu solvi queat, qui sanitatis effectus fit, vel non multum majori. Qui sunt in Medica facultate diligenter versati, ajunt, rigiditatem solidorum nimiam indicare eorum laxationem, hanc autem vigorem reparare. Sit v. g. obstructio, in qua offendimus fibrae nimiam laxitatem, ut in Chlorosi evidenter patet; ad hujusmodi laxitatem tollendam, praeter multa, quae profunt, acido-austera fossilia computantur; inter quae, Duce Van Swietenop. 36., reliquis fere omnibus palmam praeripit ferri, in acidis vegetabilibus fermentatis soluti, usus; quo miraculi instar tumentia illa frigida debilia corpora reviviscunt; nulla fit inde evacuatio liquidi distendentis, sed novum robur accedit; quo plus contracta promoveant stagnantes fere humores; illi autem, qui evacuando curare volunt hos morbos, plus debilitant. Chalybs igitur egregium remedium in obstructionibus, sive in pollinem redigatur, sive quocunque modo propinetur, illico a salibus intra machinam nostram solutus, sic agit: dum particulae illae sulphureae metallicaе, ac acido-austerae deglutiuntur, eae vel intra canales unum cum sanguine permiscuntur, vel forinsecus eorum superficiem attingunt. Si in canales appel-

lan-

lantur, massulas symbolas, seu carum cohaesionem sopitam, aut ex majore sphaerica figura auctam, exsuscitabunt: hinc ipsi sanguini teretes illae massulae minores pro sua diametro, ut per canales facillime transire possint, restituantur: & partim terreis particulis, absorbendo, imbibendoque quemcumque acidum peregrinum, obvium; partim deostruendo, aperiendoque, austeris suis operantur. Unde elasticus sanguinis motus restituitur, omnemque circuitum adimplebit. Si in vasorum superficiem agant, intricatissima fibrarum series acido-austeris roborabitur, atque idcirco vasa omnia robustiora fient, eorum elementis ad se invicem accedentibus. Mox fibrae ipsae contractae ab liquido impulso, arcus instar distentae sese abbreviant, & in lineas rectas disponunt, accedunt ad axem suae cavitatis, liquidum contentum appellant; ipsorumque canalium functio tum demum absoluitur, cum omnis obstructio penitus deletur.

Quoniam vero inanem philosophi, quem memoravi, opinionem ferre non possum, veram sententiam illustrium Virorum testimoniis, atque rationibus luculentius confirmabo. Inter quos Plinium nat. hist. lib. 34. cap. 15. de Chalybis usu scripsisse legimus: *Propinatur contra lienis vitia, absunt enim illa*. Julius Caesar Claudinus: *Proprium,*

prium, ait, melancholiae hypochondriacae alexipharmacum esse Chalybem; quoniam continuus illius usus semper felicem finem in aegris sit affectus: siquidem in referendis obstructionibus, in quibus omnis melancholiae curandae cardo versatur, nulli medicamento cedat. Et de ingress. ad infirm. in appendic. sect. 2. In curatione melancholiae hypochondriacae medicamenta chalybeata sibi nullum par habere. Aetius ferm. 2, cap. 11. affirmat: Lienosis praestantissimum esse remedium, aquam, vinum, aut poscam, in quibus ferrum extinctum fuerit, per multos dies sumtam. Quod etiam coeliacis, & lienosis multum profuisse, observavit Oribasius. Rasis lienis tumoribus utilem esse docuit, cujus affectae Serapio, Avicennas, Halyabbas fuerunt. Paulus Aegineta, aquam, in qua extinctum candens ferrum, epotam spleneticis competere monuit. Mercatus quoque dilucide hanc veritatem de morb. mulier. testatus est. Tantam esse, ait, Chalybis naturam, & efficaciam, ut magnos etiam lienis, & uteri scirrhus persanasse visum sit. Et alibi: incredibili efficacia affectionis hypochondriacae Chalybem prodesse; & experimento esse confirmatum, in omnibus fere affectionis hypochondriacae causis usum Chalybis commodum esse, sive in feminis ex utero, sive in eis, ac viris ex ventriculo, mesenterio, jecore, aut splene obstructis, aut quomodo-

dolibet humore obefis, malum oriatur. Seannertus lib. 3. part. 5. sect. 1. huic sententiae adstipulatur his verbis: Experientia diuturna, & multa constat, Chalybem ad affectionem hypochondricam, cachexiam in mulieribus ex mensium obstructione, aliosque e pertinacibus lienis, & venarum meseraicarum obstructionibus ortos morbos, esse probatum remedium, & merito ob id magni faciendum. Confirmat etiam Petrus Jo: Faber cap. 4. lib. 4. Vulnera enim, inquit, curat omnia, & ulcera maligna, & cacoethea, & obstructiones reserat omnes, immo scirrhus hepatis, & lienis, & pedetentim dissolvit, & curat. Longior sim, si Virorum Illustrium testimonia referre singula velim, quae in Mangeti Bibliotheca pharmaceutica leguntur pro decantati remedii defensione, tam in obstructionibus, quam in scirrhus ipso, morbisque aliis. Nam binis viribus Chalybs, vel ferrum praeditum est, roborandi scilicet, & aperiendi; haec in volatiliori potissimum, ac proinde in sale; illa vero in terreis particulis residet: quod plerique scriptorum aperte ostenderunt. Inter novissimos Italus quidam lib. 3. de Chlōrosi: Inter praesidia, inquit, medica, non infimum sane, & antiquitus obtinuit locum: qui & alibi ait: blande agit, obstructiones recludit, viscerum vim energem roborat, aliosque optimos, cito, ac tuto, non
prae-

praepostere modo propinetur , praestat effectus . Sed , quae sequuntur , viri optimi verba ferre nequeo : Tyrones interim monitos velim , ne corpore non rite purgato , neque humoribus non antea diu subactis , ac non bene dilutis , Martem umquam propinent . In hoc enim Sydenhamo Professori Londinensi aperte repugnat , qui genuinam , veramque methodum in praxi sedulo callebat , quem Professores omnes in ipsa exercitatisimum , & omnibus imitandum fatentur . Ipse gravissimus Auctor in differ. Epist. ad Guilielmum Cole scribens , hæc habet : Si quis obiecerit limaturam Chalybis , nisi aeger subinde fuerit expurgatus , in visceribus haerentem , ei , qui illam devoraverit , nocere posse ; Respondco primum , me nihil umquam tale in quoquam deprehendisse ; deinde longe verisimilius esse eandem mucosam , & excrementitiis partium humoribus involutam una cum istis tandem omnem elabi . Oportet ergo credamus , Italum istum vel Sydenhamum non legisse , vel si legit , contra Virum insignem , ejusque de Chalybe experimentum praefracæ stare voluisse . Mars ergo instructus diversis viribus , adstringendi videlicet , & aperiendi , in tubulorum parietes ictus non ita valide impingit , ut fibras convellat , impellat membranas , laceret , infringat , meatus magis , magisque quandoque

infarciat , abscessus , scirrhus , sanguinis , lymphaeque profusiones interiores , inflammationes , cruciatus , tormina , aliasque plurimas perquam molestas , & persaeque lethales inducat affectiones . Haec enim fabula est , quam ipse Auctor inscite comminiscitur . Non ignoro , Boerhaavium nostrum de virib. medic. p. 446. edit. ult. Venetæ scripsisse , *Chalybem in morbis acutis , ubi vasa sunt constricta , scirrhus insanabiles , aut mortem arcessere ;* quam opinionem verbis magnificis nonnulli efferunt , nec ipse improbo : nam cum Methodica consentit optime , quae , uti supra notatum est , omne laxum docet esse adstringendum , omne adstrictum laxandum . At inde non poterat philosophus ille , quem oppugnamus , in universum concludere , usum Chalybis semper esse lethalem . Quippe ipse Magnus Boerhaavius aperte tradit , esse aliquando salutarem . Ejus autem haec verba sunt Operè citato pag. 445. *In morbis laxissimis Virginum Chalybs optime conducit .* Cum Scriptoribus iis , quos ante dixi , omnino sentit Hoffmannus , qui docuit , *medicamenta Martialia cum salinis , & balsamicis maritata , commodeque exhibita non inepte pro specifico , & efficacissimis ad cachexiam , & chlorosin sanandam haberi remediis .* Nec praetermittendus videtur Pitcarnius , qui tum in affe-

ctio-

ctione hypochondriaca, tum in mensium suppressione Chalybem adhibuit. Consentit Joannes Freindius in Emmenolog. p. 213. *Chalybem etiam vi momenti sui vasa potenter aperire; quippe qui corpus valide ponderosissimum sit. Haec una est ferri proprietas, quam tom. 1. Chem. Boerhaavius agnovit: sic enim habet: quarum 1. iterum suo se distinguit pondere. 2. minus simplex praecedentibus, cum manifesta praebeat sulphuris crudi adhaerentis indicia, & combustilis verae materiae, immo vero & saepe in flammam vivam convertendae. 3. in igne fixum quidem, ita tamen, ut fumet, scintillas quasi combustili a materie spargat, pondere assiduo minuatur. 4. ductile sub malleo, in filamenta distractile, non vero in subtilitatem, quin debiscat, aut fragilitatem prodatur. Durum sonorum. 5. ignitur ante fusionem diu; funditur igne magno, omnium metallorum difficillime ignitum penitus frigidae aquae tactum fert. 6. solvitur facillime omni sale, rubescens cum iisdem, sales solventes facillime perdit, in scorias consumitur ferruginosas; hinc vix valet a rubigine praeservari. 7. facillime destructibile inter omnia metalla, illico abit in scorias. 8. magnete trahitur trahens illum. 9. corpori humano vi medicato optimum, minus inde remotum, quam alia metalla, inque eo fere solvi potest. Haec ultima proprietas dilucide nobis*
ape-

aperit, quanta polleat virtute Chalybs in humano corpore ad obstructions ejusdem eliminandas . Quin etiam experientia saepissime edocti sumus, non solum in obstructionibus , verum etiam in aliis morbis ejusdem usum esse quam maxime salutarem . Sane haec medicamina , quae ad genus pertinent adstringentium , in solidas potissimum partes agunt ; & , quod mirabile est , in nimia solidorum laxitate , post ejus usum Virginum color e pallido brevi fit rutilus , roseus ; quod Van Swietenus p. 24. in suis quoque commentariis perspicue observavit. Cum *per ferrum*, ait , *ingestum*, & *corporis exercitia augeatur in hac puella vis firmarum partium in fluida contenta*, incipit *tumens subsidere facies*, *amoeno, roseo colore genae*, & *labia perfunduntur*, *redit debitus vigor toti corpori*. Et doctissimus Freindius in Emme-nolog. pag. 213. Nemini quippe *obscurum esse arbitror Chalybem tum gravitatis suae momento, tum attenuandi vi obstructa vasa posse aperire* ; hinc enim *sanguinis lentescentis*, unde oritur *obstructio*, *cohaerentiam tollit* ; inde *humores impetu quodam per capillaria propellit*. Ergo neque inflammationes , neque canceri , neque scirrhi enascentur in corpore , si Chalybe utamur , quem certissimis documentis innocuum esse deprehendimus. Boerhaavius noster tom. 1. Chem. pag. 333. in
homi-

homine , inquit , praestantem largitur , & sine noxa fere medelam , dum caetera violentius agunt . Haec de Chalybe , ejusque usu saluberrimo dicta satis esse possunt ad inanem paucorum opinionem convellendam . Nunc de hydrargyro aliqua dicam .

Hydrargyrum volatilitate , fluiditate , gravitateque partium globosarum in minimos canales delatum , propter eorum angustiam , in minimas partes dividitur ; una cum sanguine mixtum , ejus massulas ita propellit , ut ipse celeriorum motum acquirat ; hinc potentia quidem sua premente humores attenuat , effringitque , eosque sibi invicem adhaerentes facilius per cylindrica , conicaque vasa appellit ; atque ita vitales , & naturales actiones in corpore nostro perficiuntur . Sane huc tua pertinet , Alberte Haller , docta sententia , qui p. 317. tom. 6. ita scribis : *Ab obstructionibus oriuntur morbi chronici plerique . Sed obstructiones , quatenus obstructiones sunt , sanantur omnes Mercurii viribus .* De quo eleganter Sextus Lucilius in prima .

*Adsit , qui phialae ventri sublimis adhaesit ,
Duplex Mercurius vulcano instante ; rebellem
Nam morbum irretit morborum Protea , ut olim
Sontem Japetidem Scythica sub rupe ligavit .*

Quod unum superest , oro te , Eruditissime

me Haller , ut hanc meam Dissertationem auspicio tuo , & patrocinio tueare . Vale xiv. Kal. Novembris MDCCXLV.



I M P R I M A T U R .

Si videbitur Reverendissimo Patri Magistro Sac. Palatii Apostolici.

F. M. de Rubeis Archiep. Tarfi Vicefg.

I M P R I M A T U R .

F. Raymundus Palombi Magister Socius Rm̃i Patris Mag. Sac. Pal. Apost.



FINE.